

Rådet for menneske med nedsett funksjonsemne (RMNF) i Alver

Årsmelding 2022

Rådet har hatt 8 møte, og handsama 59 saker. Alle møta var fysiske.

Det er innarbeidd rutine med førebuande møte i forkant av rådsmøta. Her går administrasjonen og leiingane i råda for eldre, unge og menneske med nedsett funksjonsemne gjennom aktuelle saker, og kjem fram til kva som skal setjast på råda sine saklister.

Både kommuneplanen sin samfunnsdel og kommunedelplanane for helse og omsorg og for oppvekst stod på sakskartet dette året. Svein Arne Vabø og Magne Bjørndal representerte rådet i referansegruppa for helse- og omsorgsplanen.

Rådet har prøvd å få fram eit mangfaldsperspektiv på desse planane: Innbyggjarane er ulike når det gjeld helse, funksjonsevne, livssyn, etnisk bakgrunn, seksuell legning osv., og skal få opplæring og oppfølging som set dei i stand til å leva aktive, meningsfylte liv på sine egne premissar.

Rådet støttar framlegget til handlingsplan mot vald i nære relasjonar, og bed om at den vert forankra og følgd opp i det kommunale tenesteapparatet.

Svein Arne Vabø representerte rådet på synfaring av vegen til dagsturhytta på Byngja.

2. mai gjennomførte rådet ei synfaring på tre tomtar som har vore aktuelle i samband med byggjeprogram for nytt bufellesskap for menneske med utviklingshemming. Administrasjonen innstilte på å starta arbeidet med eit slikt byggjeprogram i Skarsvegen 29. Fleirtalet i rådet var negative til ei slik utbygging, m.a. fordi ein meiner slike bustader bør integrerast i vanlege bumiljø, og ikkje plasserast såpass avsides som det er lagt opp til her.

Rådet drøfta retningslinjer for følgjebevis, og vedtok å be om at den nedre aldersgrensa, som har vore åtte år, vert fjerna.

Det fylkeskommunale rådet og dei to paraplyorganisasjonane for menneske med nedsett funksjonsevne (FFO og SAFO) arrangerte fylkessamling for dei kommunale råda 6.--7. oktober. Erling Jacobsen og Magne Bjørndal deltok frå rådet i Alver. Likestillingslovgeving og skulepolitikk var to stikkord for programmet.

15. desember fekk rådsleiaren høve til å ha eit innlegg i kommunestyret, i samband med handsaminga av økonomiplanen. Vi ser på dette som ei positiv anerkjenning av rådet sitt arbeid. I det heile opplever vi samarbeidet med både den politiske og den administrative leiinga i kommunen som godt, og vi nyttar dette høvet til å takka alle som legg til rette for at vi kan utføra oppgåvene våre.

Knarvik i februar 2023

Magne Bjørndal, rådsleiar